

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U ZENICI  
Broj: 43 0 St 229624 23 St  
Zenica, 09.05.2024.. godine

Općinski sud u Zenici, stečajni sudija Samra Spahić-Drino, u stečajnom postupku nad stečajnim dužnikom Društvo za proizvodnju, trgovinu i usluge „T-GROUP“ d.o.o. Zenica, sa sjedištem na adresi ZAVNOBiH-a br. 49, Zenica, matični registarski broj subjekta upisa 43-01-0173-09, nakon održanog ročišta 12.3.2024. godine, kome su prisustvovali privremeni stečajni upravnik Hadžirašidović Jasmin i osnivač i zastupnik po zakonu stečajnog dužnika Topoljak Amir, van ročišta, dana 09.05.2024. godine donio je:

### R J E Š E N J E

Otvara se i zaključuje stečajni postupak nad stečajnim dužnikom Društvo za proizvodnju, trgovinu i usluge „T-GROUP“ d.o.o. Zenica, sa sjedištem na adresi ZAVNOBiH-a br. 49, Zenica, matični registarski broj subjekta upisa 43-01-0173-09, zbog nepostojanja imovine dovoljne za pokriće troškova stečajnog postupka, te se nalaže brisanje ovog privrednog društva iz sudskog registra zavedenog pod matični registarski broj 43-01-0173-09, po pravomoćnosti ovoga rješenja.

### O b r a z l o ž e n j e

Prijedlogom od 11.05.2023. godine predlagač Društvo za proizvodnju, trgovinu i usluge „T-GROUP“ d.o.o. Zenica podnio je ovom sudu prijedlog za otvaranje stečajnog postupka nad navedenim društvom zbog platežne nesposobnosti stečajnog dužnika.

Rješenjem ovog suda od 18.01.2024. godine pokrenut je prethodni postupak za utvrđivanje uvjeta za otvaranje stečajnog postupka nad navedenim društvom, te je radi utvrđivanja uvjeta za otvaranje stečajnog postupka nad ovim društvom za privremenog stečajnog upravnika imenovan Hadžirašidović Jasmin iz Zenice.

Iz izvještaja privremenog stečajnog upravnika, koji je dostavljen sudu 13.02.2024. godine, proizilazi da prema mišljenju privremenog stečajnog upravnika postoji razlog za otvaranje stečajnog postupka iz razloga platežne nesposobnosti, jer je račun blokiran 60 dana neprekidno, da prijedlog za otvaranje stečajnog postupka nije podnesen u roku od 60 dana od dana nastupanja platežne nesposobnosti., da dužnik nema imovine koja može pokriti troškove stečajnog postupka, da nema imovine koju bi obezbjeđivao i o kojoj bi se strao privremeni stečajni upravnik, a poslovanje se ne može nastaviti u toku prethodnog postupka. Predložio je da sud pozove povjerioce i zainteresovana lica da u roku od 30 dana predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM, u protivnom da se otvori i zaključi stečajni postupak.

Privremeni stečajni upravnik je na ročištu održanom 12.03.2024. godine ostao kod izvještaja, te je izjavio da je stečajni dužnik prema bilansu stanja na dan 31.12.2022. godine ostvario gubitak iznad visine kapitala sa 31.12.2022. godine u iznosu od 102.073,00 KM, a to znači da sa ekonomskog stanovišta imovina ne može pokriti stvorene obaveze, a u bilansu uspjeha za period 01.01.2022. do 31.12.2022. godine iskazao neto gubitak za 2022. godinu u iznosu od 2.855,00 KM, te da je i u 2021. godini iskazan neto gubitak u iznosu od 8.937,00 KM, što znači da nije u stanju izmirivati svoje obaveze odnosno da je nesolventan. Bilansne pozicije aktive i pasive zaključno sa 31.12.2022. godine su: konto - novac i novčani ekvivalenti iznosi 12,00 KM, konto - Vlasnički kapital iznosi 2.000,00 KM, konto - Gubitak iznosi 104.073,00 KM, konto - Ukupno kapital iznosi -102.073,00 KM, konto - obaveze prema dobavljačima i ugovorne obaveze iznose: 100.391,00 KM, konto – Ostale obaveze iznosi 1.694,00 KM, a prema podacima iz javnih registara nema

pokretne i nepokretne imovine, tako da nema imovine koju bi trebalo obezbjediti i o kojoj bi se trebalo starati. Kada su u pitanju obaveze, prema bilansu stanja na dan 31.12.2022. godine, struktura istih je sljedeća: obaveze prema dobavljačima i ugovorne obaveze u iznosu od 100.391,00 KM druge obaveze u iznosu od 1.650,00 KM, te obaveze za ostale poreze i druge dažbine u iznosu od 44,00 KM, što sveukupno čini iznos od 102.085,00 KM. Dugovanja po osnovu obaveza po osnovu plata, naknada i ostalih primanja zaposlenih iznose ukupno 100.391,00 KM, a odnose na obaveze iz radnog odnosa koje su nastale prema direktoru kao jedinom zaposleniku dužnika. Bilansna stavka-„ostale obaveze“ iznosi ukupno 1.694,00 KM, i odnosi se na obaveze za komunalnu taksu u iznosu od 1.650,00 KM, te na obaveze članarine turističkih zajednica i naknade korištenja šuma u iznosu od 44,00 KM, a provjerom kod Centralne banke BiH utvrdio je da je evidentirano samo jedno zaduženje u iznosu od 1,71 KM kod MKF LIDER Sarajevo. Račun kod NLB Banka d.d. Sarajevo ugašen je 27.11.2012. godine, a glavni račun je blokiran 01.07.2015. godine, te prema Pregledu naloga prinudne naplate od 29.01.2024. godine na dan 29.01.2024. godine blokiran je na iznos od 78.412,68 KM, po osnovu rješenja Porezne uprave F BiH KPU Zenica. S obzirom na to da je račun dužnika blokiran 01.07.2015. godine, te imajući u vidu odredbe člana 6. stav (3) i (5) Zakona o stečaju, jasno proizilazi da postoje razlozi za otvaranje stečajnog postupka jer je račun dužnika blokiran 60 dana neprekidno. Organ ovlašten za zastupanje stečajnog dužnika nije podnio prijedlog za otvaranje stečajnog postupka u roku od 60 dana od dana nastupanja platežne nesposobnosti, uz napomenu da je glavni račun dužnika blokiran prije stupanja na snagu Zakona o stečaju („Službene novine Federacije BiH” broj: 53/2021). Istakao je da kako ne postoji stečajna masa iz koje bi se namirivali troškovi stečaja, predlaže da sud pozove povjerioce i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM, na koji bi se način stekli razlozi za otvaranje stečajnog postupka, a u protivnom ako ne postupe predlažem da sud otvori i zaključi stečajni postupak.

Sud je donio odluku kao u izreci iz sljedećih razloga.

Odredbom člana 102. stav 6. Zakona o stečaju („Službene novine F BiH”, broj: 53/21) propisano je da stečajni sudija otvara stečajni postupak nad imovinom stečajnog dužnika ako je prijedlog dopušten, ako postoji stečajni razlog i ako će imovina stečajnog dužnika prema predviđanju biti dovoljna da namiri troškove postupka, dok je stav 7. istog člana propisano da ako imovina stečajnog dužnika ne pokriva troškove postupka, a prijedlog je dopušten i osnovan, stečajni sudija će javnim pozivom, objavljenim na oglasnoj tabli suda, web stranici suda - elektronskoj tabli suda i u „Službenim novinama Federacije BiH“, pozvati povjerioce i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka, u iznosu koji odredi stečajni sudija. Stavom 8. istog člana propisano je da ako u roku iz stava 7. ovog člana povjerioci i zainteresirana lica ne predlože otvaranje stečajnog postupka i ne uplate predujam, stečajni sudija će otvoriti stečajni postupak i odmah zaključiti postupak.

Imajući u vidu prethodno navedeno, sud je primjenom odredbe člana 102. stav 7. Zakona o stečaju, rješenjem od 12.3.2024. godine pozvao povjerioce i zainteresovana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM, te da po izvršenoj uplati predujma sudu dostave uplatnicu, kao dokaz da je uplata izvršena. Visina troškova srazmjerno je određena visini troškova koji se očekuju, a koji su neophodno potrebni za otvaranje i vođenje stečajnog postupku.

Rješenje ovog suda od 12.03.2024. godine objavljeno je na oglasnoj tabli suda 15.03.2024. godine, na web stranici suda 14.03.2024. godine i objavljeno je u „Službenim novinama Federacije BiH“ broj: 23/24 od 27.03.2024. godine.

Kako stečajni dužnik ima obaveze, dok nema imovine ni za namirenje troškova stečajnog postupka, a povjerioci i zainteresovana lica po proteku roka ostavljenog u rješenju donesenom od strane ovog suda nisu predložili otvaranje stečajnog postupka niti predujmili novčani iznos potreban za

pokrivanje troškova stečajnog postupka, to je primjenom odredbe člana 102. stav 8. Zakona o stečajnom postupku, odlučeno kao u izreci ovog rješenja.

Shodno odredbi člana 108. i člana 204. stav 5. Zakona o stečaju, ovim rješenjem određen je upis rješenja o otvaranju i zaključenju stečajnog postupka koje uslijed nedostatka mase prestaje postojati, te brisanje ovog pravnog lica iz sudskog registra.

**POUKA O PRAVNOM LIJEKU**

Protiv ovog rješenja može se izjaviti žalba u roku od 8 dana od dana dostavljanja, Kantonalnom sudu u Zenici putem ovog suda u tri primjerka.

Stečajni sudija

Samra Spahić-Drino